



MØTEINNKALLING

Utval: Formannskapet
Møtedato 10.11.2022
Møtetid: Kl. 09:00
Møtestad: Kommunestyresalen - kommunehuset

Varamedlem skal ikkje møta utan nærare innkalling

Forfall til møtet må meldast snarast råd til servicesenteret (tlf. 56 58 74 00 eller e-post postmottak@samnanger.kommune.no), som vil kalla inn varamedlem.

Me ber om at alle som kan vera ugilde i ei eller fleire saker på sakslista melder frå om dette til servicesenteret.

Statsforvaltaren i Vestland ved Silje Elvatun Sikveland skal halda presentasjon om kantvegetasjon i byrjinga av møte.

Knut Harald Frøland
ordfører

SAKLISTE

Saker til handsaming på møtet

Sak nr.	Arkivsak	Sakstittel	Merknad
052/2022	22/844	Godkjenning av innkalling og sakliste	
053/2022	22/844	Faste saker	
054/2022	22/517	Godkjenning av møteplan for 2023	
055/2022	22/831	Budsjett 2023 for kyrkja	
056/2022	21/152	NOA og Krafla	
057/2022	21/609	Evaluering av kommunestyrevedtak 02.12.2021 om stengetid i skuleferiane i barnehage og SFO 2022	
058/2022	22/749	Eigarskapsmelding for Samnanger kommune	
059/2022	22/517	Ordning med høve til fjernmøte for folkevalde organ i Samnanger	
060/2022	18/951	Søknad om straumstøtte til Eikedalen Skisenter vintersesongen 2022/2023	
061/2022	18/1050	Renovasjonsgebyr 2023	
062/2022	22/830	Betalingssatsar 2023 - Gebyr og Avgifter	
063/2022	22/326	Budsjett og økonomiplan 2023- 2026	

Oversikt faste saker

- Godkjenning av innkalling og sakliste
- Eventuelle merknader til protokoll frå førre møte
- Orienterings-/referatsaker
- Utvalet sitt kvarter



SAKSFRAMLEGG

Sakshandsamar: Marianne Soleng	Arkivkode: FE-033
Arkivsaksnr: 22/844	Løpenr: 22/8627
Sakstype: Politisk sak	

SAKSGANG

Styre, utval, komité m.m.	Møtedato	Saksnr
Formannskapet	10.11.2022	052/2022

Godkjenning av innkalling og sakliste

Rådmannen sitt framlegg til vedtak:

- Innkalling og sakliste vert godkjent.



SAKSFRAMLEGG

Sakshandsamar: Marianne Soleng	Arkivkode: FE-033
Arkivsaksnr: 22/844	Løpenr: 22/8628
Sakstype: Politisk sak	

SAKSGANG

Styre, utval, komité m.m.	Møtedato	Saksnr
Formannskapet	10.11.2022	053/2022

Faste saker

Rådmannen sitt framlegg til vedtak:

· Orienterings-/referatsaker vert tekne til orientering.

Oversikt over faste saker:

Eventuelle merknader til protokoll frå førre møte.

Orienterings-/referatsaker.

Utvalet sitt kvarter.



SAKSFRAMLEGG

Sakshandsamar: Jan Erik Boge	Arkivkode: FE-033
Arkivsaksnr: 22/517	Løpenr: 22/5839
Sakstype: Politisk sak	

SAKSGANG

Styre, utval, komité m.m.	Møtedato	Saksnr
Formannskapet	10.11.2022	054/2022
Kommunestyret		

Godkjenning av møteplan for 2023

Rådmannen sitt framlegg til vedtak:

Framlegget til møteplan for 2023 blir vedteke. Vedtaket er gjort med heimel i § 11-2 i kommunelova.

Dokument som er vedlagt:

Politisk møteplan 2023 - framlegg frå rådmannen

Dokument som ikkje er vedlagt:

- Kommunelova
- Reglement for kommunestyret, formannskapet, naturutvalet og kontrollutvalet
- Kommunestyret sitt vedtak 22.02.2018 i sak 002/2018
- Kommunestyret sitt vedtak 06.05.2021 i interpellasjon om møtetidspunkt i kommunestyret

Oppsummering/samandrag:

Møteplan for 2023 for kommunestyret og diverse andre kommunale organ skal vedtakast av kommunestyret i desembermøtet 2022. Rådmannen har utarbeidd forslag til møteplan for 2023. Rådmannen sitt forslag blir handsama av formannskapet, som gir innstilling til kommunestyret.

Saksopplysningar:

Bakgrunn for saka:

Jf. kommunestyrevedtak i sak 002/2018 og punkt 2.22 i kommunen sitt reglement skal det i kommunestyret sitt desembermøte leggjast fram sak om møteplan for neste kalenderår. Møteplanen skal ifølgje vedtaket omfatta kommunestyret, formannskapet, naturutvalet, administrasjonsutvalet, arbeidsmiljøutvalet, eldrerådet, ungdomsrådet og rådet for personar med nedsett funksjonsevne.

Kontrollutvalet, som har eige sekretariat som ikkje har tilknytning til kommuneadministrasjonen,

fastset møteplanen sin sjølv.

Faktagrunnlag, problemskildring og moglege løysingar:

Generelle reglar for fastsetjing av møteplan står i punkt 2.22 i kommunen sitt reglement for kommunestyret, formannskapet, naturutvalet og kontrollutvalet. Desse reglane er baserte på kommunestyret sitt vedtak i sak 002/2018, og er som følger:

Generelle reglar for fastsetjing av møteplan

Frå og med 2018 skal det i kommunestyret sitt desembermøte leggast fram sak om møteplan for kommunestyret, formannskapet, naturutvalet, administrasjonsutvalet, arbeidsmiljøutvalet, eldrerådet, ungdomsrådet og rådet for personar med nedsett funksjonsevne. Kommunestyret skal der vedta møteplanen for desse organa for det komande året. Det enkelte organet skal ha fullmakt til å gjera justeringar i møteplanen sin i løpet av året dersom det er behov for dette.

Kontrollutvalet, som har eige sekretariat som ikkje har tilknytning til kommuneadministrasjonen, fastset møteplanen sin sjølv.

Frå og med 2022 er ikkje arbeidsmiljøutvalet med i rådmannen sitt framlegg til møteplan. Årsaka til dette er at arbeidsmiljøutvalet med verknad frå 21.10.2021 er eit reint administrativt organ utan politiske medlemmer, jf. vedtak i kommunestyret 21.10.2021 i sak 097/2021.

På møteplanen for 2023 må det også setjast opp møte i valstyret, som følgje av at det skal vera kommunestyre- og fylkestingsval i 2023. Det er i rådmannen sitt forslag ikkje lagt inn møte i skulane sine ferieveker.

I rådmannen sitt framlegg til møteplan for 2023 er det lagt inn følgjande tal møte:

Organ/utval/råd	Tal møte i 2023	Møtedag
Kommunestyret	8*	Torsdag
Formannskapet	6	Torsdag
Naturutvalet	6	Tysdag
Valstyret	4	Ikkje fast møtedag

Organ/utval/råd	Tal møte i 2023	Møtedag
Adm.utvalet	2	Torsdag
Eldrerådet	4	Tysdag
Ungdomsrådet	6	Tysdag
Rådet for pers. med nedsett f.evne	3	Onsdag

Det sett opp to møte i kommunestyret i oktober 2023. Det første av desse er avslutningsmøte for det noverande kommunestyret, og det andre er konstituerande møte for det nyvalde kommunestyret. Det er også sett opp ein dag med folkevaldopplæring for det nye kommunestyret i november 2023.

Økonomi:

Tabellen nedanfor viser kva kostnadene til møtegodtgjersle vil bli med rådmannen sitt forslag til møteplan for 2023. Kostnader til møtegodtgjersle til varamedlemmer som møter i enkeltsaker, mat under møta og eventuell dekking av tapt arbeidsforteneste vil koma i tillegg. Kostnader til møtegodtgjersle for kontrollutvalet vil også koma i tillegg.

Organ	Sats for møtegodtgjersle	Tal medlemmer*	Møtegodtgjersle pr. møte	Tal møte i 2023	Sum møtegodtgjersle 2023	Arb.gj.avgift (14,1 %)	Sum 2023 inkl. arb.gj.avgift
Kommunestyret	1 810	20	36 200	8	289 600	40 834	330 434
Formannskapet	1 810	8	14 480	6	86 880	12 250	99 130
Naturutvalet	1 810	9	16 290	6	97 740	13 781	111 521
Valstyret	1 810	8	14 480	4	57 920	8 167	66 087
Administrasjonsutvalet	1 810	4	7 240	2	14 480	2 042	16 522
Eldrerådet	1 810	5	9 050	4	36 200	5 104	41 304
Ungdomsrådet	460	6	2 760	6	16 560	2 335	18 895
Rådet for pers. med nedsett funksjonsevne	1 810	3	5 430	3	16 290	2 297	18 587
SUM					615 670	86 809	702 479

**) Medlemmer som får utbetalt møtegodtgjersle*

Uttalar frå andre råd, utval eller instansar:

Det ligg ikkje føre nokon uttalar. Som nemnt ovanfor i saksutgreiinga, fastset kontrollutvalet møteplanen sin sjølv.

Vurderingar og konsekvensar:

Rådmannen foreslår ingen vesentlege endringar i møtefrekvens for politiske organ i 2023 i forhold til 2022. Rådmannen har i arbeidet med saka vurdert å foreslå ein ekstra møterunde i vårhalvåret for kommunestyret, formannskapet og naturutvalet. Det hadde i så fall vorte fire møterundar i vårhalvåret, i staden for tre. Det har dei siste åra vore nokre utfordringar knytt til at det har vore relativt lang tid mellom dei to siste møterundane i vårhalvåret (primært at det har vorte mange saker til handsaming i møterunden i juni). Rådmannen foreslår likevel at det framleis skal vera tre møterundar i vårhalvåret, ikkje fire. Det vil vera krevjande for administrasjonen dersom det skal vera kortare tid mellom møterundane på vårhalvåret enn det er no. Det er mykje administrativt arbeid i samband med kvar møterunde, og arbeidsmengda vil auka dersom talet på møterundar/møte skal aukast.



SAKSFRAMLEGG

Sakshandsamar: Jan Erik Boge	Arkivkode:
Arkivsaksnr: 22/831	Løpenr: 22/8469
Sakstype: Politisk sak	

SAKSGANG

Styre, utval, komité m.m.	Møtedato	Saksnr
Formannskapet	10.11.2022	055/2022
Kommunestyret		

Budsjett 2023 for kyrkja

Rådmannen sitt framlegg til vedtak:

Samnanger kommune gir i 2023 eit driftstilskot på 3 181 300 kroner til Samnanger kyrkjestyre. I tillegg kjem kommunal tenesteyting vurdert til verdi av 60 000 kroner.

Kommunen gir òg eit investeringstilskot på 520 000 kroner til Samnanger kyrkjestyre i 2023, til følgjande tiltak:

- 300 000 kroner til ringjeanlegg i kyrkja på Ådland.
- 120 000 kroner til oppussing av våpenhuset (gangen) i kyrkja på Ådland.
- 100 000 kroner til planlegging av reparasjon/uviding av gravplass på Ådland.

Vedtaket er gjort med heimel i § 14 i Lov om tros- og livssynssamfunn.

Dokument som er vedlagt:

Budsjettvedtak 2023 Samnanger kyrkjestyre

Dokument som ikkje er vedlagt:

- Lov om trus- og livssynssamfunn

Oppsummering:

Samnanger kyrkjestyre har i budsjettvedtaket sitt for 2023 bedt kommunen om driftstilskot på 3 533 900 kroner og 520 000 kroner i investeringsmidlar. Rådmannen foreslår at det blir gitt eit driftstilskot på 3 181 300 kroner og 520 000 kroner i investeringsmidlar. I tillegg kjem kommunal tenesteyting vurdert til ein verdi av 60 000 kroner.

Saksopplysningar:

Bakgrunn for saka:

Kommunen løyver kvart år midlar til driftsbudsjett for Samnanger kyrkjestyre (soknerådet som «fellesråd»). Budsjettet til kyrkjestyret er delt opp i administrasjon, kyrkjer, kyrkjegard og anna kyrkjeleg verksemd. Kommunen sitt økonomiske ansvar er lovregulert.

Kommunen har etter lov om trus- og livssynssamfunn økonomisk ansvar for kyrkja. Dette er spesifisert i § 14 i lova:

«Kommunen gir tilskudd til kirkens virksomhet lokalt, herunder tilskudd til bygging, vedlikehold og drift av kirkebygg. Tilskuddet skal sikre at kirkebyggene holdes i forsvarlig stand, slik at de kan benyttes til gudstjenester og kirkelige handlinger. Tilskuddet skal også sikre at soknet har tilfredsstillende bemanning ved gudstjenester og kirkelige handlinger, herunder kirketjener, klokker og organist/kantor ved hver kirke, og tilstrekkelig administrativ hjelp. Kommunens tilskudd gis etter budsjettforslag fra soknet. I budsjettforslaget skal også tilskudd til kirkelig undervisning, diakoni og kirkemusikk inngå.

Etter avtale med soknet kan kommunen yte tjenester i stedet for å gi tilskudd etter andre ledd.

Kommunen kan ta opp lån for å finansiere investeringer i kirkebygg og tilhørende varige driftsmidler.»

Kommunestyret kan også løyva midlar til investeringar knytt til kyrkja.

Kyrkjestyret si oppgåve er å fordela midlar til kyrkjebudsjettet. Kommunestyret skal bestemma kor stor ramma till kyrkja skal vera.

Fakta grunnlag, problemskildring og moglege løysingar:

Samnanger kyrkjestyre har i budsjettvedtaket sitt (kyrkjestyresak 31/22) foreslått eit kommunalt driftstilskot på 3 533 900 kroner i 2023. Dette er ein auke på om lag 552 000 kroner samanlikna med driftstilskotet for 2022. Kommunal tenesteyting kjem i tillegg.

Budsjett 2022 (tildelt driftstilskot frå kommunen)	Kyrkjestyret sitt budsjettframlegg for 2023
kr 3 051 354 i driftstilskot	kr 3 533 900 i driftstilskot
kr 70 000 i kommunal tenesteyting (inkl. IKT)	kr 57 500 i kommunal tenesteyting (ekskl. IKT)

Kyrkjestyret har i budsjettvedtaket sitt òg bedt om midlar til tre investeringsprosjekt i 2022:

- 300 000 kroner til ringjeanlegg i kyrkja på Ådland.
- 120 000 kroner til oppussing av våpenhuset (gangen) i kyrkja på Ådland.
- 100 000 kroner til planlegging av reparasjon/uviding av gravplass på Ådland.

Budsjettvedtaket/budsjettdokumentet til Samnanger kyrkjestyre følgjer vedlagt. Der er det diverse informasjon om bakgrunnen og premissane for budsjettvedtaket. Dette gjeld mellom anna bakgrunnen for auken i driftstilskotet som kyrkjestyret ber om for 2023. Hovudpunkt her er:

- 75 000 kroner i auke til vedlikehald og utstyr.
- 203 800 kroner i auke til lønn og avgifter, av dette er 117 100 kroner auke i pensjonsutgifter.
- 57 000 kroner i auke til straumutgifter.

Budsjettdokumentet inneheld òg oversikt/omtale av vedlikehalds- og investeringstiltak. Dette gjeld både tiltak som ligg inne i budsjettvedtaket og tiltak «på vent».

Vurderingar og konsekvensar:

Vurderingar:

Rådmannen si vurdering er at kyrkjestyret bør få auka driftstilskot i 2023 samanlikna med 2022, primært for å kompensera for auka prisar og lønnskostnader. Rådmannen har i framlegget sitt til lagt inn 3 181 300 kroner i driftstilskot til kyrkjestyret for 2023. I tillegg kjem tenesteyting, som er vurdert å ha ein verdi på 60 000 kroner. Tenesteytinga består av arbeid med lønn, økonomi og snøbrøyting. Rådmannen sitt framlegg inneber ein auke i driftstilskotet på 200 000 kroner (ca. 6,5 prosent) samanlikna med 2022. Dette er ein litt høgare prosentvis auke enn det rådmannen foreslår for einingane i kommunen. Det er likevel om lag 352 000 kroner i skilnad mellom rådmannen sitt forslag og tilskotssummen kyrkjestyret ber om.

Tenesteyting

Kommunen har tidlegare vurdert verdien av tenesteyting til å vera 70 000 kroner. Tenesteytinga var då inkludert IKT-teneste som var vurdert til 20 000 kroner pr. år. Dette er ei teneste som kyrkja no må kjøpa frå IKT Nordhordland, og delar av tenesteytinga er derfor gjort om til tilskot. Kommunen vurderer no tenesteytinga til å vera 60 000 pr. år. Då er det òg tatt omsyn til at verdien av tenesteytinga har stått uendra nokre år. Kommunen sitt skifte av lønns- og økonomisystem i 2020 førte til at kyrkjekontoret gjer meir av arbeidet med bilagsføring sjølv, men det vil no likevel vera naturleg å vurdera verdien av den kommunale tenesteytinga litt opp.

Investeringar

Rådmannen har i framlegget sitt lagt inn midlar til alle dei tre investeringstilskota kyrkjestyret ber om i 2023, til saman 520 000 kroner. Eit av desse tiltaka er 100 000 kroner til planlegging av reparasjon/utviding av gravplassen på Ådland. I tillegg er det i rådmannen sitt økonomiplanframlegg lagt inn 1 million kroner i 2025 til gjennomføring av denne reparasjonen/utvidinga. Rådmannen har ikkje lagt inn midlar til nokon av vedlikehalds-/investeringstiltaka «på vent».

Konsekvensar:

Rådmannen har forståing for kyrkjestyret sin argumentasjon for å auka driftsbudsjettet samanlikna med 2022, men kan likevel ikkje tilrå ein så stor auke som kyrkjestyret ønskjer. Rådmannen har lagt inn auke som er tenkt å kompensera for auka prisar og lønnskostnader.

Dei tre investeringstiltaka som kyrkjestyret har bedt om midlar til for 2023, er lagt inn i rådmannen sitt framlegg og vil kunne gjennomførast då.



SAKSFRAMLEGG

Sakshandsamar: Øyvind Røen	Arkivkode: FA-S09
Arkivsaksnr: 21/152	Løpenr: 22/8599
Sakstype: Politisk sak	

SAKSGANG

Styre, utval, komité m.m.	Møtedato	Saksnr
Formannskapet	10.11.2022	056/2022
Kommunestyret		

NOA og Krafla

Ordføreren sitt framlegg til vedtak:

Samnanger kommune godtek ikkje innstillinga frå NVE om kvar den nye luftlinja til NOA og Krafla skal gå mellom Børdalen og Gaupholms-marka. Kommunen krev at linja skal følgja den eksisterande traséen for luftlinja mellom Børdalen og Fana. Det einaste akseptable alternativet til denne traséen er ein jordkabel mellom Børdalen og Ospevika.

Det er under planlegging nye luftlinjer og oppgradering av eksisterande luftlinjer i Samnanger kommune. Konsekvensane er at det som alt er store fotavtrykk i Samnanger-naturen, vert mykje større.

For å gjera inngrepa i naturen så små som mogeleg har Samnanger kommune tidleg i planfasen for NOA og Krafla-prosjektet stilt krav om at ny luftlinje skal følgja den eksisterande luftlinjetraséen mellom Børdalen og Fana. Dette kravet har prosjektleiinga for NOA og Krafla lagt til grunn for kva løysing prosjektet skal få.

Kva saka gjeld:

NVE (Noregs vassdrags- og energidirektorat) har nyleg sendt ei innstilling til Olje- og energidepartementet om elektrifisering av petroleumsfelta NOA og Krafla med kraft frå land. Utbygging av nettet i samband med elektrifiseringa vil påverka Samnanger kommune.

NVE legg til grunn Statnett si vurdering om at Samnanger transmisjonsnettstasjon er eit sterkt punkt i nettet, og at det er driftsmessig forsvarleg å knyta til auka forbruk her. Forbruket til tiltaket er med i det som er venta forbruksauke i regionen, og er såleis ein del av datagrunnlaget i NVE sin rapport «Langsiktig kraftmarkedsanalyse» frå 2021.

I innstillinga rår NVE til at det blir gjeve løyve til ein 360 meter lang 420 kV jordkabel frå Samnanger transmisjonsnettstasjon til nye Børdalen transformatorstasjon og ein 11 km lang 145 kV kraftleidning mellom Børdalen og Ospevika i Samnanger kommune. I tillegg vil det koma ein 250 km lang sjøkabel frå landfallet i Ospevika gjennom sjøområde i Samnanger, Bjørnafjorden, Tysnes, Fitjar og Austevoll

kommunar og ut til felte NOA og Krafla. NVE rår òg til at det blir gjeve løyve til ein ny transformatorstasjon i Børdalen og ei utviding av Samnanger transmisjonsnettstasjon. Anlegga NVE tilrår løyve til, vil verta betalte av utbyggjarane Aker BP, LOTOS og Equinor. Nettkundane vil difor ikkje få høgare nettleige pga. prosjektet.

Dei elektriske anlegga vil på ulike måtar ha negative verknader for natur og naturbruk. Her kan nemnast snauhogst til trasérydding, auka kollisjonsfare for fuglar og hindringar for fiskeriverksem under legginga av sjøkabelen. NVE rår difor til at det blir sett vilkår om ein miljø-, transport- og anleggsplan som vert drøfta med dei påverka kommunane og med fylket og grunneigarane. For å redusera verknadane frå anleggsarbeidet under bygginga, rår ein òg til at det vert sett spesifikke vilkår knytte til fiskeri, marint naturmangfald, skogrydding og transport.

I tillegg til prosjektet NOA og Krafla er det under planlegging ny 420 kV kraftlinje mellom Børdalen og Kollsnes; dessutan oppgradering til 420 kV av eksisterande luftlinjer på strekningane Børdalen–Evanger, Børdalen–Mauranger og Børdalen–Fana. Nye luftlinjer og oppgraderingar av eksisterande luftlinjer fører med seg større master og breiare gater. Konsekvensane er at store fotavtrykk av luftlinjer i Samnanger-naturen vert mykje større.

Samnanger kommunestyre vedtok 24.02, i sak 003/22 denne fråsegna:

Samnanger kommune er uroa for kraftsituasjonen og nettkapasiteten i bergensregionen, og viser i denne samanheng til fråsegna til fylkesutvalet i Vestland, som peiker på at det allereie er prosjekt innan landbasert industri som har vorte stansa grunna låg nettkapasitet. Kommunestyret stiller difor spørsmål ved klokskapen i å gje konsesjon for landstraum til NOA/Krafla-prosjektet. Kommunestyret stiller også spørsmål ved kvifor ikkje havvind er vurdert i samband med kraftforsyninga av dette prosjektet, ut frå regjeringa sine ambisjonar om at elektrifisering av sokkel i størst mogleg grad skal skje med havvind eller anna fornybar straum produsert på sokkel.

Viss tiltaket skal gjennomførast, meiner Samnanger kommune at det skal stillast krav om at tiltakshavar må gje Samnanger kommune økonomisk kompensasjon for naturinngrepa som Samnanger vert påført, og etter kommunen sitt syn er ikkje eigedomsskatt tilstrekkeleg. Det er betydelege inngrep Samnanger må tola i dette tilfellet, for at Noreg skal oppfylle klimaforplikingane sine, og fotavtrykka i naturen Samnanger vil vera varige. Særleg det terrestriske naturmangfaldet vert råka hardt, i samband med ryddebelta under kraftlinene. Samnanger kommune syner her til at det vart gitt kompensasjon til kommunar for dei dei såkalla «monstermastene» i Hardanger og Samnanger.

Kommunen meiner dessutan at det skal stillast krav til at tiltakshavar må gje kompensasjon til laga og foreiningane som vert hindra i å utøva aktivitetane sine i anleggsperioden. Omfanget og konsekvensane av tiltaket er godt opplyste i søknaden.

Samnanger kommune er nøgd med at tiltakshavar har teke omsyn til innspel frå grunneigarar og kommunen i utarbeidinga av søknaden. Mellom anna er transformatorstasjonen flytta frå Gaupholmsmarka til Børdalen; landfallet er flytta frå Barmen til Ospevika, og det er brukt meir jordkabel, enn først planlagt, frå Gaupholmsmarka til Ospevika. Kommunen ynskjer vidare tett dialog om parallellføringa langs den kommunale vegen Ytre-Tysse, i samband med detaljprosjektering og utarbeiding av miljø-, transportog anleggsplan (MTA). Kommunen er positiv til tiltakshavar sitt innspel om at Ospevika vert oppgradert til eit attraktivt bade- og rekreasjonsområde, og at vegen opp til skytebana vert oppgradert og asfaltert.

Det er både positive og negative sider ved at luftlinjer og jordkabel vert lagt parallelt med eksisterande inngrep. Det er negativt at dei eksisterande inngrepa vert auka/utvida, men det er positivt at ein då ikkje legg beslag på urørt natur i nye område.

Vurdering og konsekvensar

Det kom som ei stor overrasking for Samnanger kommune at NVE i innstillinga si til Olje- og energidepartementet foreslår ei kraftig justering av planlagd luftlinjetrasé mellom Børdalen og Ospevika. Samnanger kommune gav tidleg i planleggingsprosessen tydeleg melding til prosjektleiinga for NOA og Krafla at ei eventuell ny luftlinje i Samnanger må følgja eksisterande trasé for linja Børdalen–Fana. Prosjektleiinga for NOA og Krafla har lagt dette synspunktet frå Samnanger kommune til grunn for vidare planlegging.

NVE si innstilling er spesielt skuffande då Samnanger kommune under heile planleggingsfasen har hatt ein god og konstruktiv dialog med prosjektleiinga for NOA og Krafla-linja. Samnanger kommune har ikkje på noko tidspunkt før NVE gav innstillinga si til OED, vorte gjort merksam på at det kunne vera aktuelt for NVE å rå til ein annan luftlinjetrasé. Samnanger kommune opplever seg difor ført bak lyset. Innstilling frå NVE fører til at naturinngrepa i samband med luftlinja til NOA og Krafla vert uakseptabelt store.

Vert NVE si innstilling teken til følgje, vil dette setja uakseptable fotavtrykk i Samnanger-naturen. Det vil òg vera eit dårleg utgangspunkt for god dialog og lokal forankring m.o.t. til dei nye og omfattande prosjekta som vil råka Samnanger kommune i åra som kjem.



SAKSFRAMLEGG

Sakshandsamar: Bodil Helliesen Øpstebø	Arkivkode: FA-A10
Arkivsaksnr: 21/609	Løpenr: 22/8467
Sakstype: Politisk sak	

SAKSGANG

Styre, utval, komité m.m.	Møtedato	Saksnr
Formannskapet	10.11.2022	057/2022
Kommunestyret		

Evaluering av kommunestyrevedtak 02.12.2021 om stengetid i skuleferiane i barnehage og SFO 2022

Rådmannen sitt framlegg til vedtak:

Dei lokale vedtektene for SFO og barnehage vert endra i tråd med vedtaksteksten i avsnitt to og tre nedanfor. I tillegg vert påmeldingsalternativet «40 % kombinasjonsplass 2 dagar morgon og ettermiddag» teke ut av SFO-vedtektene. Endringane gjeld frå og med 01.01.2023.

SFO vert stengt i juli månad, romjula og påskeveka og i tillegg på helge- og høgtidsdagar og jule- og nyttårsaftan, samt på planleggingsdagane. SFO har ope ca. 20 dagar i tillegg til dei lovpålagde 190 skuledagane (Opplæringslova § 13-7).

Barnehagane vert stengde to veker om sumaren (veke 29 og 30 i juli), onsdag før påske, på helge- og høgtidsdagar, jule- og nyttårsaftan samt på planleggingsdagane, men er elles opne i alle feriar. I romjula vert det samarbeid mellom barnehagane og tilbod om éin open barnehage med opningstid 08.00-16.00.

Prisjustering kjem i budsjettet, der ein legg inn timepris på 38,50 kroner i SFO. Dette vert gjort for å kunne forenkla og bruka digital fakturering i kommunen sitt faktureringssystem.

Dokument som ikkje er vedlagt:

Saksframlegg og vedtak kommunestyret 02.12.2021 i sak KS-118/2021
Opplæringslova og forskrift til opplæringslova
Barnehagelova og rammeplan
Vedtekter for SFO
Vedtekter for barnehage
Tilbakemelding frå FAU, SU i skule og barnhagane og dei tilsette

Oppsummering:

Rådmannen foreslår at det vert gjort justeringar i kva dagar SFO og kommunale barnehagar skal

halda ope i feriane, og at desse endringane vert innarbeide i dei lokale vedtektene for SFO og barnehage. Forslaget inneber ein reduksjon i tilbodet i forhold til 2022 som er eit prøveår. Det vert foreslått at SFO held stengt i heile juli, romjula og heile påskeveka. Det vert vidare foreslått at barnehagane skal halda stengt i veke 29 og 30 (to veker i juli) og onsdag før påske, samt at opningstida i barnehagane i romjula vert kl. 08.00-16.00. Dette for å organisera betre og ha flest mogleg tilsette tilgjengeleg når det er flest barn, samt å kunne spare noko utgifter. Det vert samkøyring mellom barnehagane ut frå kor mange barn som er påmeldt.

Saksopplysningar:

Etter spørsmål frå foreldre og arbeidsgjevare vart det etterspurt meir fleksibel opningstid for barnehage og SFO. Dette har no vore prøvd ut frå jula 2021 og gjennom 2022. Det har vore prøvd ut utvida sommarope barnehage i to veke samt ope i romjula. For SFO har me hatt tilbod omlag 5 veker i sommar, påskeveka, dagane før jul og romjul.

Ein ser at nokre av foreldra har hatt reelle behov for ferieopent og dei har vore nøgde med tilbodet dei har fått i feriane.

Bakgrunn for saka:

Hausten 2021 kom det førespurnad til kommunen, mellom anna frå foreldre, om det var mogleg med meir ferieope/fleksibel opningstid i barnehage og SFO. Kommunestyret handsama sak om dette 02.12.2022 (sak KS-118/2021), der følgjande vart vedteke:

«Dei lokale vedtektene for SFO og barnehage vert endra slik at det med verknad frå 2022 skal gjevast eit tilbod om barnehage og SFO i alle skuleferiane, men ikkje på helge- og høgtidsdagar og jule- og nyttårsaftan, samt på planleggingsdagane. Rådmannen får fullmakt til å rette vedtektene til SFO og barnehage i tråd med dette vedtaket.

Rådmannen organiserer drift på ein forsvarleg måte med samkøyring i ein barnehage der ein tek omsyn til bindande påmelding ut frå behov. I tillegg utvidar SFO opningstida si med to veker - veke 27 og 28 om sumaren.

Kommunen skal bruka 2022 til å gjera seg erfaringar og evaluera tilbodet ut frå etterspurnad og økonomi.....»

Ordninga har no vore prøvd ut frå jula 2021 og gjennom 2022. Det har vore prøvd ut utvida sommarope i barnehage i to veker, samt ope i romjula. For SFO har det vore tilbod om lag fem veker i sommar, i påskeveka, i dagane før jul og i romjula.

I tråd med kommunestyret sitt vedtak er det no gjennomført ei evaluering.

Evaluering:

Evalueringa viser at nokre av foreldra har hatt reelle behov for ferieope og at dei har vore nøgde med tilbodet dei har fått i feriane i denne perioden. Evalueringa syner òg at det er eit behov hos nokre foreldre når det gjeld å bruka barnehagen i romjula og veke 29 og 30, men at det ikkje var behov i SFO i same periode.

Nokre foreldre har gjeve tilbakemelding om endra behov undervegs. Døme på dette kan vera at barn ikkje ynskjer å gå (nytta tilbodet) på grunn av at det er så få barn, at endring av stad for barnehage-/SFO-tilbodet gjer nokon utrygge, eller at det vert dyrt å bruka SFO mange dagar i ferien.

Nokre foreldre har nemnt at i helse og omsorg har ein vekselvis tidleg og sein sommarferie, og at dei difor berre har behov for ferieope annakvart år når dei skal jobba veke 29 og 30.

Noko av bakgrunnen for saka som kommunestyret handsama 02.12.2021, var at det på grunn av koronapandemien var viktig for kommunen å ha moglegheit til å kalla inn tilsette på jobb, også frå ferie om naudsynt. Dette gjaldt spesielt i helse og omsorg. Ein del av dei tilsette har barn i

barnehage- og småskulealder, og det vart vurdert som viktig at kommunen skulle ha eit barnehage- og SFO-tilbod også i feriar/tilsvarande. Evalueringa syner at dette ikkje har vore eit stort behov i denne perioden.

I veke 29/2022 var fire barn frå Vassloppa barnehage og ingen barn frå Dråpeslottet barnehage påmelde. I veke 30/2022 var ingen barn frå Vassloppa og tre barn frå Dråpeslottet påmelde. Tilbodet i veke 30 var i Dråpeslottet. Dette tyder på at det er usikkert kor stort det reelle behovet for barnehagetilbod var desse vekene. Uansett kan det peikast på at valfridom for foreldre er viktig.

For organiseringa av barnehagedrifta med ope i alle feriar er det utfordrande å få avvikla lovpålagd ferie. Dagens ordning krev meir bruk av vikarar når faste tilsette må ta ut feire i veker dei fleste barna er i barnehagen. Dette fører til auka bruk av vikarar, og det er også ei utfordring at det er vanskeleg å få tak i vikarar.

Ei ordning der SFO held stengt i fire veker i sommarferien vil truleg føra til meir arbeidsro i skulen gjennom skuleåret og ikkje så stort behov for vikarar. Foreldra har gitt tilbakemelding om at dei er kjempefornøgde dersom SFO har ope 5-7 dagar etter skuleslutt, 5 dagar før skulestart og i haustferien og vinterferien. Det er heller ikkje lovpålagt å ha SFO-tilbod i feriane.

I evalueringsperioden har nokre få brukt SFO i den utvida ferieopningstida, men erfaringa er at behovet er lite og at nokre påmelde barn ikkje møtte fordi foreldra hadde funne andre løysingar. Det vart også peika på frå foreldre si side at barna er skuleelevar og ikkje barnehagebarn lenger, og at dei difor reagerte på løysinga med samkøyring av SFO- og barnehagetilbodet. Samkøyringa vart av desse fordeldra ikkje oppfatta som eit godt tilbod. SFO-barna skal avvikle samanhengande ferie i minst tre veker. I romjula var det ingen påmelde til SFO og difor stengt.

Kvar veke SFO er open må kommunen leggja til rette for 12 timar gratistilbod for elevane i 1. klasse for elevar i 5.-7. klasse med særskilde behov, jf. forskrift til opplæringslova kap. 1B.

Fordeling av ca 20 dagar i rådmannen sitt framlegg til vedtak er foreslått slik, (men varierer litt med kalender og skulerute):

Før skulestart	Hautstferie	Før jul	Vinterferien	Etter skuleslutt
5-8 dagar	5 dagar	1-4 dagar	5 dagar	5-8 dagar

Erfaring kostnader SFO sommaren 2022:

	v 25 juni	v 26 juni	v 27 juli	v 28 juli	v 29 juli	v 30 juli	v 31 aug	v 32 aug	Totalt
Sum	Kr 16 179	Kr 26 950	Kr 5 390	Kr 13 475	Kr 0	Kr 0	Kr 13 475	Kr 24 225	Kr 99 694
Tal vaksne	2 vaksne 3 dagar	2 vaksne 5 dagar	1 vaksen 2 dagar	1 vaksen 5 dagar	0	0	1 vaksen 5 dagar	3 vaksne	

Kostnader dei andre opne dagane vekene før jula 2021 og resten 2022:

	Hautstferie	Før jul	Romjula	Vinterferie	Påskeveka	Totalt
Sum	Kr 37 730	Kr 16 170	Kr 0	Kr 26 950	Kr 5 390	Kr 86 240
Ta vaksne	3 vaksne 3 dagar 2 vaksne 2 dagar	2 vaksne 3 dagar	0	2 vaksne 5 dagar	1 vaksen 2 dagar	

Økonomi	SFO
Utgifter	Kr 185 955
Inntekter foreldrebetaling	Kr 46 666
Andre utgifter	Kr 20 000
Totalt	Kr 159 289

I tillegg kjem utgifter til vikar når tilsette skal ta ut ferie og elevane er på skulen. Dei som jobbar i SFO

jobbar også i skulen. Kostnader til reinhald ligg på eining for teknisk drift og er ikkje med i tala ovanfor.

Det vil vera variasjon i behovet frå år til år, og kostnaden vil endra seg i tråd med tal elevar og eventuelt gratis plassar.

Forslag om endring i vedtektene for SFO:

I tillegg til endra tilbod i feriar m.m., foreslår rådmannen at eit av alternativa for SFO-plass/tilbod vert fjerna frå SFO-vedtektene. Dette gjeld alternativet med kombinasjonsplass to dagar morgon og ettermiddag. Dette alternativet er lite i bruk og ein har for mange ulike alternativ. Å fjerna dette alternativet vil også forenkla organiseringa av SFO.

Uttalar frå andre:

FAU ved Samnanger barneskule sitt hovudynskje er ope i alle feriar, og med samarbeid barnehage og SFO med ei samanslåing i nokre av desse vekene.

FAU barnehage ynskjer ope i alle feriar, i eigen barnehage.

Dei tilsette i barnehagane er opptekne av forutsigbarheit og god struktur som tener foreldra, barna og dei tilsette. Dei ser utfordringar med å blanda SFO og barnehage, samt utfordringar med å få teke ut ferie for alle tilsette om ein skal ha ope heile sumaren.

Dei tilsette i SFO ynskjer stengt i romjula, påskeveka og juli månad.

Kostnader barnehage: 2 veke ferieope i juli:

Tidspunkt	Kostnad	Tilsette	Løn vikarar når dei tek ferie	Totalt
Veke 29, 30	Kr 67 375	3+2 tilsette	Kr 67 375	Kr 134 750
romjula	Kr 45 815	3+2 vaksne	Kr 45 815	Kr 91 630
				Kr 226 380

Vurderingar og konsekvensar:

Evalueringa syner at nokre foreldre har behov for ferieope i barnehage og SFO.

Andre foreldre har gitt tilbakemelding om endra behov undervegs, at barn vil ikkje bruka tilbodet i ferien fordi det er så få barn som møter, eller at dei må gå i ein annan barnehage enn den dei vanlegvis går i.

For dei tilsette er det utfordrande å få avvikla ferie når barna sin ferie vert spreidd gjennom heile året og dette gjer til at ein må ha inn ein del vikarar i barnehage og skule for å få avvikla lovpålagd ferie. Ved å redusera ferietilbodet i barnehagane og SFO noko (to veker stenging i barnehagane og fire veker i SFO), vert det enklare for tilsette å få avvikla ferien sin. Dette vil også føra til meir arbeidsro i barnehagane og på barneskulen gjennom skule-/barnehageåret.

Det er nødvendig å redusera kostnadene i sektor for oppvekst i kommunen. Det er viktig med ei streng prioritering når det gjeld tilbodet i denne sektoren. Lovpålagde tenester/tilbod kan ikkje veljast vekk, men tenester/tilbod ut over dette må vurderast nøye for å redusera kostnader. Dette gjeld mellom anna tilbod om opningstid i SFO og barnehage ut over det som er lovpålagt.

Det er også eit moment at kommunen har fått nye kostnader knytt til SFO, som følgje av lovpålagt 12 timar gratis SFO til alle 1. klassingane. Hausten 2023 gjeld dette 21 barn = kr 368 676. Dette er for dei 190 skuledagane og i tillegg kjem 20 dagar i ferievekene. Døme: 12 timar*38,50 kr *15 elevar*4 veke = kr 27 720

Konsekvensar:

Barnehage: Foreldre har meldt frå om behov for oppe i feriane for å kunne utøva arbeidet sitt. Samstundes har nokon foreldre meldt frå om at barna har rett på eit trygt og godt oppvekstmiljø og at dette er vanskeleg å ivareta ved byte av barnehage og «ukjent» personale i ferien. Det er påmelding og barnehagane fordel tilsett ut frå dette. Det er kjent tilsett frå deira barnehage, for dei barna som er påmeldt, noko foreldra vert gjort kjent med på førehand.

SFO: Ein ser at SFO ikkje vart brukt i romjula 2021 og i dei to ekstra vekene sumaren 2022 då tilbodet var samkøyrd med barnehagetilbodet. Samstundes ser me at det var få som brukte SFO i påskeveka 2022. Det vert difor foreslått at SFO held stengt i desse periodane frå no av.

Konklusjon:

Samnanger kommune ynskjer å gje eit best mogleg tenestetilbod i barnehage og skule/SFO, ut frå reelle behov. Samstundes er det viktig å bruka ressursane effektivt og prioritera dei periodane der det er eit faktisk behov for å ha eit tilbod. Etter ei samla vurdering foreslår rådmannen at barnehage- og SFO-tilbodet vert redusert noko i forhold til det kommunestyret vedtok 02.12.2021, jf. rådmannen sitt framlegg til vedtak.



SAKSFRAMLEGG

Sakshandsamar: Jan Erik Boge	Arkivkode:
Arkivsaksnr: 22/749	Løpenr: 22/7817
Sakstype: Politisk sak	

SAKSGANG

Styre, utval, komité m.m.	Møtedato	Saksnr
Formannskapet	10.11.2022	058/2022
Kommunestyret		

Eigarskapsmelding for Samnanger kommune

Rådmannen sitt framlegg til vedtak:

Rådmannen sitt forslag til eigarskapsmelding for Samnanger kommunen blir vedteke.

Heimel for vedtaket er kommunelova § 26-1.

Dokument som er vedlagt:

Forslag til eigarskapsmelding for Samnanger kommune

Dokument som ikkje er vedlagt:

- Kommunelova (Lov 2018-06-22-83 om kommuner og fylkeskommuner)
- Prop 46 L (2017–2018) om Lov om kommuner og fylkeskommuner
- Kommentarutgave til kommuneloven 2018 (Kommuneforlaget, Overå og Bernt, 2019)
- Hefte frå KS – «Anbefalinger om eigerskap, selskapsledelse og kontroll»

Oppsummering:

Den nye kommunelova frå 2018 inneheld krav om at kommunestyret minst èin gong i valperioden skal vedta ei eigarskapsmelding. Denne meldinga skal mellom anna innehalda informasjon om kommunen sine prinsipp for eigarstyring, oversikt over selskap/føretak/andre verksemder kommunen har eigarinteresser i, og kommunen sitt føremål med eigarinteressene. Rådmannen har no utarbeidd forslag til eigarskapsmelding.

Saksopplysningar:

Bakgrunn for saka:

Det går fram av § 26-1 i kommunelova at det minst èin gong i valperioden skal utarbeidast ei eigarskapsmelding som skal vedtakast av kommunestyret. § 26-1 regulerer også kva eigarskapsmeldinga skal innehalda.

Kravet om eigarskapsmelding kom inn i lovverket då den noverande kommunelova frå 2018 vart vedteken og iverksett. Det har ikkje tidlegare vorte utarbeidd eigarskapsmelding for Samnanger kommune. Rådmannen har no utarbeidd forslag til eigarskapsmelding.

Fakta grunnlag, problemskildring og moglege løysingar:

Fakta grunnlag

Ordlyden i § 26-1 i kommunelova er som følgjer:

§ 26-1. Eierskapsmelding

Kommuner og fylkeskommuner skal minst én gang i valgperioden utarbeide en eierskapsmelding som skal vedtas av kommunestyret eller fylkestinget selv.

Eierskapsmeldingen skal inneholde

- a. kommunens eller fylkeskommunens prinsipper for eierstyring
- b. en oversikt over selskaper, kommunale eller fylkeskommunale foretak og andre virksomheter som kommunen eller fylkeskommunen har eierinteresser eller tilsvarende interesser i
- c. kommunens eller fylkeskommunens formål med sine eierinteresser eller tilsvarende interesser i virksomhetene nevnt i bokstav b.

I forarbeida til kommunelova (Prop. 46 L 2017–2018) går det på side 317 fram meir detaljert kva typar selskap, føretak m.m. eigarskapsmeldinga skal innehalda informasjon om:

- aksjeselskap
- interkommunale samarbeid etter IKS-lova (lov om interkommunale selskap)
- samvirkeføretak
- kommunale oppgåvefelleskap
- vertskommunesamarbeid
- kommunale føretak

Det går også fram i forarbeida at stiftingar ikkje bør omfattast av eigarskapsmeldinga. Det går også fram i Kommentartutgave til kommuneloven 2018 (Kommuneforlaget, Overå og Bernt, 2019) at det ikkje er krav om at stiftingar skal takast med i eigarskapsmeldinga.

Jf. Prop 46 L 2017–2018 bør eigarskapsmeldinga innehalda «*kommunens overordnede prinsipper for eierstyring og prinsippene for eierstyringen av den enkelte enhet, formålet med den enkelte enhet samt en omtale av virksomheten i den enkelte enhet*».

Problemskildring

Mange kommunar har allereie utarbeidd og vedteke eigarskapsmelding. I arbeidet med forslag til eigarskapsmelding for Samnanger kommune, er det mellom anna sett på innhaldet i nokre av desse (Modalen, Rødøy og Moss). Det er relativt stor skilnad i korleis ulike kommunar har bygd opp eigarskapsmeldingane sine.

Samnanger kommune har eigarinteresser i ei rekke selskap, og er også med i ulike vertskommunesamarbeid, oppgåvefelleskap og andre avtalebaserte samarbeid. Rådmannen sitt forslag til eigarskapsmelding inneheld oversikt over dette, samt informasjon om kvart enkelt selskap/oppgåvefelleskap/samarbeid.

Rådmannen sitt forslag til eigarskapsmelding inneheld også forslag til prinsipp for eigarstyring, instruks for eigarrepresentantar m.m.

Rådmannen foreslår at frå og med valperioden 2023–2026 skal eigarskapsmeldinga gjennomgåast og reviderast av kommunestyret i løpet av det første heile kalenderåret i kvar valperiode, første gong i 2024. Rådmannen foreslår også at det etter kvart kommunestyreval skal gjennomførast opplæring i eigarstyring for folkevalde.

Uttalar frå andre:

Det er ikkje henta inn uttalar frå andre i samband med arbeidet med eigarskapsmeldinga.

Vurderingar og konsekvensar:**Vurderingar:**

Det er relativt stor variasjon i korleis ulike kommunar sine eigarskapsmeldingar er bygde opp. I rådmannen sitt forslag til eigarskapsmelding er det teke omsyn til kva typar selskap og andre eigarinteresser Samnanger har, mellom anna at det ikkje er nokon kommunale føretak i kommunen. Rådmannen har i forslaget prøvd å ikkje ta med informasjon som ikkje er relevant for Samnanger, men likevel sikra at forslaget dekkar kommunelova sine krav til eigarskapsmelding. Det er heilt sikkert rom for forbetringar i eigarskapsmeldinga, men det viktigaste no er truleg at det blir vedteke ei melding som i alle fall oppfyller minstekrava i kommunelova.

I rådmannen sitt forslag er det også lista opp ein del samarbeid m.m. i tillegg til det som er minstekravet for eigarskapsmelding i kommunelova § 26-1. Dette er primært gjort for å gje ei god oversikt over ulike samarbeid m.m. som kommunen deltek i.

Konsekvensar:

Gjennom å vedta ei eigarskapsmelding no, vil kommunestyret oppfylle kravet i § 26-1 i kommunelova om at ei slik melding skal vedtakast minst ein gong i kvar valperiode. Etter rådmannen sitt forslag vil det nye kommunestyret som vert valt hausten 2023 få opp sak om eigarskapsmelding i løpet av 2024, og gjennom dette sikra at kravet i kommunelova § 26-1 også vert oppfylt i neste valperiode.

Det vil ikkje vera nokon økonomiske konsekvensar knytt til vedtak av eigarskapsmeldinga.



SAKSFRAMLEGG

Sakshandsamar: Jan Erik Boge	Arkivkode: FE-033
Arkivsaksnr: 22/517	Løpenr: 22/8444
Sakstype: Politisk sak	

SAKSGANG

Styre, utval, komité m.m.	Møtedato	Saksnr
Formannskapet	10.11.2022	059/2022
Kommunestyret		

Ordning med høve til fjernmøte for folkevalde organ i Samnanger

Rådmannen sitt framlegg til vedtak:

Det blir med verknad frå 01.01.2023 innført som fast ordning at folkevalde organ i Samnanger kommune ved behov kan halda møte som fjernmøte (digitale møte). Møte skal berre haldast som fjernmøte dersom det ligg føre forhold som tilseier at organet ikkje kan samlast til fysisk møte, for eksempel omsyn til smittevern.

Publikum skal ha moglegheit til å vera til stades (ha digital tilgang) til alle fjernmøte i folkevalde organ, med unntak av i saker som blir handsama i lukka møte.

Vedtaket er gjort med heimel i kommunelova § 11-7 første avsnitt.

Dokument som ikkje er vedlagt:

- Kommunelova
- Reglement for kommunestyret, formannskapet, naturutvalet og kontrollutvalet

Oppsummering:

Kommunestyret vedtok i 2021 mellombels ordning med høve til fjernmøte (digitale møte) for folkevalde organ i kommunen. Ordninga gjeld fram til 31.12.2022. Rådmannen foreslår no å innføra fast ordning med høve til fjernmøte for folkevalde organ, men med ei presisering om at publikum skal ha moglegheit til å vera til stades (ha digital tilgang) til alle fjernmøte.

Saksopplysningar:

Bakgrunn for saka:

Kommunestyret har i samband med koronapandemien vedteke at alle folkevalde organ i kommunen ved behov kan halda møte som fjernmøte (digitale møte) fram til 31.12.2022. Kommunestyret må no ta stilling til om ordninga skal vidareførast, endrast eller avsluttast.

Faktagrunnlag, problemskildring og moglege løysingar:

Kommunestyret gjorde i perioden med koronapandemi tre vedtak om høve til fjernmøte. Vedtaka vart gjort 28.10.2020, 10.06.2021 og 02.12.2021. Bakgrunnen for vedtaka var primært behovet for å gjennomføra møte som fjernmøte på grunn av koronapandemien, som eit førebyggjande tiltak mot smitte. I vedtaket som kommunestyret gjorde 02.12.2021 er det presisert at møte berre skal haldast som fjernmøte dersom dette blir vurdert som nødvendig av smittevernomsyn eller andre forhold som tilseier at organet ikkje kan samlast til fysisk møte.

Det går fram av kommunelova § 11-7 at det er kommunestyret som avgjer om folkevalde organ i kommunen skal ha høve til å halda møte som fjernmøte. Dersom kommunestyret ikkje har gjort vedtak som opnar for fjernmøte, kan folkevalde organ som hovudregel ikkje halda møte som fjernmøte. Etter reglane i kommunelova vil det i så fall berre vera høve til å nytta fjernmøte i såkalla hastesaker, ref. reglar i kommunelova § 11-8.

Smitteverntiltak knytt til koronapandemien er no i all hovudsak avvikla, og koronapandemien kan neppe lenger brukast som argument for å bruka fjernmøte som møteform. Det kan likevel vera andre argument for at det bør vera opning for fjernmøte i folkevalde organ i kommunen.

Møta i kommunestyret, formannskapet og naturutvalet blir overførte på internett, og det blir også lagt ut opptak frå møta. Denne ordninga gjeld ikkje for møta i andre folkevalde organ i kommunen.

Kommunen sitt Reglement for kommunestyret, formannskapet, naturutvalet og kontrollutvalet inneheld ingen reglar om/for fjernmøte.

Vurderingar og konsekvensar:

Vurderingar:

Kommunestyret kan velja to hovudalternativ i denne saka:

1. Bestemma at det ikkje lenger (etter 31.12.2022) skal vera høve til fjernmøte for folkevalde organ i kommunen, bortsett frå i hastesaker.
2. Bestemma at det skal innførast permanent ordning med høve til fjernmøte for folkevalde organ i kommunen.

Alternativ 1 bør veljast dersom kommunestyret meiner at det berre er i spesielle situasjonar/periodar (for eksempel under ein pandemi) det skal opnast for at ordinære møte i folkevalde organ skal haldast som fjernmøte. I så fall må kommunestyret gjera vedtak dersom det for eksempel oppstår ein ny pandemi.

Alternativ 2 bør veljast dersom kommunestyret meiner det skal innførast ei generell ordning der det blir opp til leiaren i det enkelte folkevalde organet å avgjera om eit møte skal haldast som fysisk møte eller fjernmøte. Det kan også tenkjast ei mellomløyning, der det blir opna for fjernmøte i spesielle situasjonar (for eksempel i samband med pandemi). I tillegg kan det tenkjast at ein variant der det berre blir opna for fjernmøte i dei organa som overfører møta sine på internett.

Sjølv om fjernmøte kan vera praktisk og «lettvinnt», er vurderinga til rådmannen at hovudprinsippet i kommunen bør vera at møte i folkevalde organ blir haldne som fysiske møte. Det går fram av § 11-5 i kommunelova at alle har rett til å vera til stades i møte i folkevalde organ. Sjølv om dette vilkåret kan oppfyllast også ved fjernmøte (dersom fjernmøtet blir overført på internett eller publikum får tilgang til sjølv Teams-møtet/tilsvarande), vil det truleg vera noko som «går tapt» ved fjernmøte i forhold til ved fysiske møte. Dette vil truleg gjelda både for møtedeltakarane og publikum.

For dei folkevalde organa som overfører møta på internett, vil publikum ha tilgang til møta sjølv om dei blir haldne som fjernmøte. Ved fjernmøte i andre organ (som ikkje overfører møta sine på internett) vil det sjølv sagt kunne opnast for Teams-lenke/tilsvarande til møtet blir offentleggjort på

kommunen sine nettsider. Dette vil likevel kanskje ikkje vera ei uproblematisk løysing, fordi andre enn møtedeltakarane då vil vera inne i det digitale møtet.

I koronaperioden har det vorte gjennomført ein del fjernmøte i folkevalde organ i Samnanger. I 2022 har det også vorte gjennomført fjernmøte utan at det har vore smittevernmessig behov for dette. Samfunnsutviklinga med aukande digitalisering tilseier at fjernmøte truleg vil bli meir og meir aktuelt, og det vil truleg vera fornuftig å ha opning for denne møteforma i Samnanger.

Konsekvensar:

Valet av ordning i denne saka vil ha minimale økonomiske konsekvensar.

Ved gjennomføring av fjernmøte, er det viktig å unngå at konsekvensen blir at publikum ikkje har tilgang til møtet. Utvalsleiaren, saman med rådmannen, bør ha ansvar for å sørge for at publikum får tilgang også til fjernmøte som ikkje blir overførte på internett.

Konklusjon:

Rådmannen tilrår at det blir innført permanent ordning med høve til fjernmøte for folkevalde organ i kommunen. Den mellomlange ordninga som kommunestyret vedtok 02.12.2021 bør vidareførast med nokre justeringar. Hovudprinsippet i kommunen bør framleis vera at møte i folkevalde organ skal haldast som fysiske møte.



SAKSFRAMLEGG

Sakshandsamar: Jan Erik Boge	Arkivkode: FE-223
Arkivsaksnr: 18/951	Løpenr: 22/8399
Sakstype: Politisk sak	

SAKSGANG

Styre, utval, komité m.m.	Møtedato	Saksnr
Formannskapet	10.11.2022	060/2022
Kommunestyret		

Søknad om straumstøtte til Eikedalen Skisenter vintersesongen 2022/2023

Rådmannen sitt framlegg til vedtak:

Søknaden om kommunal straumstøtte/sal av konsesjonskraft på gunstige vilkår til Eikedalen Skisenter blir ikkje innvilga.

Dokument som er vedlagt:

Søknad om kompensasjon (e-postmelding)
Søknad om straumtilskot
Årsrapport 2021 for Eikedalen Skisenter AS
Strømsituasjonen i Eikedalen Skisenter (e-postmelding)
Strømsituasjon i Eikedalen Skisenter
Vedtaker for Samnanger kommune sitt næringsfond

Oppsummering:

Eikedalen Skisenter har gjennom Samnanger Næringsforum sendt søknad til kommunen om straumstøtte vintersesongen 2022/2023. Skisenteret fryktar at dei utan kommunal straumstøtte ikkje kan halda drifta ope komande vinter, grunna høge straumutgifter. Dei søker primært om å få kjøpa konsesjonskraft frå kommunen på gunstige vilkår.

Saksopplysningar:

Bakgrunn for saka:

Kommunen mottok 22.10.2022 ein søknad om tilskot til straumkostnader til Eikedalen Skisenter for vintersesongen 2022/2023. Søknaden vart sendt gjennom Samnanger Næringsforum v/leiar Knut Bjørnås. Bakgrunnen for søknaden er høge straumkostnader. Det er opplyst i søknaden at med dagens straumprisar, og forventa straumprisar gjennom vintersesongen, er det lite truleg at skitrekka kan halda drifta open komande vinter. Det er også opplyst at det er begrensa kor mykje av straumkostnaden som kan hentast inn ved auka billettprisar. Det blir i søknaden oppmoda om at kommunen snarast ser på kva moglegheiter han har til å hjelpa skisenteret økonomisk. Det blir i søknaden framheva at stenging av skisenteret vil ha negative ringverknader for næringslivet i

Samnanger, for talet på arbeidsplassar i kommunen og for alpingruppa i Samnanger idrettslag. Årsrapport 2021 for Eikedalen Skisenter med revisjonsberetning og årsrekneskap låg ved søknaden.

Kommunen mottok 26.10.2022 eit skriv med utfyllande informasjon frå Eikedalen Skisenter. Dette gjeld mellom anna detaljar om kva straumavtalar skisenteret har. Det går i skrivet mellom anna fram at straumavtalen skisenteret har fram til 31.12.2022 gjer at det vil vera utelukka å produsera kunstsnø i desember 2022, slik dei vanlegvis gjer, og at dette vil gje konkurrentane deira fortrinn. I tillegg blir det presisert at skisenteret ikkje er på jakt etter «kontantstøtte», men å kjøpa konsesjonskraft frå kommunen på gunstige vilkår (tilsvarande ordning som i Ullensvang kommune). Det er også opplyst at straumforbruket i vintersesongen (desember–april) utgjer om lag 350 000 kilowattimar (kWh), og at dersom straumprisen overstig 5 kroner per kWh vil det ikkje lenger vera grunnlag for drift med skisenteret sin noverande straumavtale.

I Samnanger er det per d.d. ingen kommunale ordningar med straumstøtte verken til innbyggjarar/husstandar, verksemdar eller lag/organisasjonar. Det er heller ikkje gjort nokon vedtak som opnar for å selja kommunen si konsesjonskraft på gunstige vilkår.

Faktagrunnlag, problemskildring og moglege løysingar:

Formannskapet handsama 06.10.2022 ei sak om kommunal straumstønad, på bakgrunn av eit initiativ frå Samnanger Kristeleg Folkeparti. Det vart der vedteke at eventuell bruk av generell straumstønad til innbyggjarane bør vurderast som tiltak på planlagt seminar for kommunestyret 01.11.2022 om relativ fattigdom. Bortsett frå dette, har det ikkje vorte gjort nokon vedtak om kommunal straumstøtte. Kommunestyret gjorde heller ikkje noko vedtak 01.11.2022.

I søknadsbrevet som kommunen mottok frå Samnanger Næringsforum (søknad datert 21.10.2022) går det fram at leiaren i næringsforumet har vore i kontakt med Voss Resort skisenter. Han har der fått informasjon om at dei inngjekk fastprisavtalar på straum for om lag to år sidan, og at skisentera på Voss derfor ikkje er direkte påverka av dei høge straumprisane.

I skriv datert 26.10.2022 frå Eikedalen Skisenter er det vist til ordning i Ullensvang kommune, ref. vedtak i Ullensvang kommunestyre 20.10.2022, og til at dagleg leiar for Røldal Skisenter har stadfesta at alle skisentera i Ullensvang får kjøpt straum for 1 kroner per kWt frå kommunen. Også nokre andre kommunar med høge kraftinntekter har innført kommunale straumstøtteordningar, for eksempel Suldal og Bykle. Dei aller fleste kommunane i landet har per i dag ikkje innført kommunale straumstøtteordningar, heller ikkje Samnanger.

Årsrapport 2021 for Eikedalen Skisenter AS med årsrekneskap og revisjonsberekning ligg ved søknaden. Det går der fram at selskapet fekk eit godt årsresultat i 2021 (ca. 5,98 millionar kroner). Dagleg leiar for skisenteret opplyser at det gode årsresultatet skuldast at dei måtte selja ein leilegheit/personalbustad og at dei selde seg ut av eit aksje-/rentefond, og at dette vart gjort for å finansiera nytt skitrek som vart bygd i 2021.

Samnanger kommune kjøper årleg 22,321 GWh konsesjonskraft frå BKK. Prisen kommunen må betala for å kjøpa konsesjonskrafta blir fastsett av styresmaktene sentralt, og er i 2022 på 11,57 kroner per kWh. Kommunen betalar i underkant av 2,6 millionar kroner for konsesjonskrafta i 2022, og sel den vidare i marknaden gjennom ein forvaltar. Kommunestyret vedtok 28.10.2020 (i sak KS-077/2020) å gje rådmannen delegert fullmakt til å inngå avtalar om sikring av pris for sal av konsesjonskraft, innanfor ein middels/låg risikoprofil. Kommunen har inngått avtale med firmaet Kinect Energy Spot AS om å forvalta heile konsesjonskraftporteføljen i perioden fram til 31.12.2024. Det ser per i dag ut til at kommunen kan få ei nettoinntekt på konsesjonskraft på om lag 34 millionar kroner i 2022. For 2023 er det per i dag forventa ei nettoinntekt på om lag 30 millionar kroner, men dette talet er usikkert.

Styresmaktene sentralt har innført nokre få støtteordningar for næringslivet (lånegarantiar og ei energitilskotsordning for straumintensive bedrifter). Det går ikkje fram av søknaden frå Eikedalen

Skisenter om dei har avklart om dei vil kunne koma inn under nokon av desse ordningane. Regjeringa har signalisert at dei vurderer å innføra fleire straumstøtteordningar for næringslivet, men per i dag er det ikkje klart kva ordning/ordningar som vil bli innført, eller når dette eventuelt vil skje.

Styresmaktene sentralt har også innført ei søknadsbasert straumstøtteordning for frivillige lag og organisasjonar. For skisenter er denne ordninga berre aktuell dersom verksemda i hovudsak blir driven av frivillig arbeidsinnsats og det ikkje er høve for privatpersonar eller kommersielle føretak å oppnå økonomiske fordelar frå verksemda. Ordninga kan også gjelda skianlegg der idrettsklubb(ar) utgjer meir enn 50 prosent av eigarskapen i anlegget. Eikedalen Skisenter vil ikkje kunne koma inn under denne ordninga.

Eventuelle kommunal økonomisk støtte til næringsdrivande må gjevast i samsvar med gjeldande lov- og regelverk, mellom anna EØS-regelverket.

Samnanger kommune har eit næringsfond som verksemder i kommunen kan søkja om midlar frå. Formannskapet er fondsstyre. Det går fram av vedtektene for næringsfondet at stønad frå fondet kan gjevast som lån eller garantiar, men at det ikkje kan gjevast stønad til den daglege drifta av verksemder. Kopi av vedtektene frå næringsfondet følgjer vedlagt.

Uttalar frå andre:

Som nemnt ovanfor i dette dokumentet har Samnanger Næringsforum oppmoda om at kommunen snarast ser på kva moglegheiter han har til å hjelpa Eikedalen Skisenter økonomisk i den komande vintersesongen.

Vurderingar og konsekvensar:

Vurderingar:

Som det er vist til i søknaden, er Eikedalen Skisenter ei viktig verksemd i Samnanger kommune, og det vil ha konsekvensar dersom skisenteret må halda stengt. Rådmannen si vurdering er likevel at det per i dag ikkje vil vera rett å gje straumstøtte til ei enkeltverksemd. Ei eventuell ordning med kommunal straumstøtte til næringsdrivande bør ha tydelege reglar/vilkår og bli kunngjort, mellom anna for å sikra likebehandling. Kommunen har per no ikkje oversikt over eventuelle andre næringsdrivande som har utfordringar med dei høge straumprisane. Dersom ei slik ordning skal vurderast innført, bør dette helst gjerast i samband med handsaminga av årsbudsjett/økonomiplan eller årsrekneskap.

Rådmannen vil ikkje tilrå at Eikedalen Skisenter får tilbod om å kjøpa konsesjonskraft på gunstige vilkår. Årsaka til dette er både omsynet til likebehandling av næringsdrivande, samt at kommunen for å kunne tilby dette truleg vil måtte kjøpa seg ut av delar av kontrakten som er inngått med Kinnect Energy Spot AS. I tillegg har ikkje Samnanger kommune ein økonomisk situasjon som tilseier at me bør innføra ei slik ordning, sjølv om me per i dag har gode inntekter frå konsesjonskraft.

Støtte frå næringsfondet vil neppe vera aktuelt å gje i dette tilfellet, jf. at vedtektene for fondet ikkje opnar for å gje stønad til den daglege drifta.

Rekneskapstala for 2021 tyder på at økonomien i Eikedalen Skisenter AS er god, mellom anna eigenkapitalsituasjonen. Det er vanskeleg for rådmannen å vurdere i kva grad selskapet sjølv har moglegheit til å dekkja større ekstra straumkostnader.

Konsekvensar:

Dersom Eikedalen Skisenter får tilbod om å kjøpa konsesjonskraft på gunstige vilkår vintersesongen 2022/2023 (for eksempel til 1 krone per kWt), vil kommunen tapa inntekter på sal av konsesjonskraft. Dersom straumprisen for eksempel er 2 kroner og Eikedalen får kjøpa 350 000 kWt konsesjonskraft til 1 krone per kWt, tilseier eit enkelt reknestykke at kommunen vil tapa om lag 350 000 kroner i inntekter. Det faktiske tapet kan vera større eller mindre enn dette.

Det vil ha konsekvensar dersom Eikedalen Skisenter held stengt i delar eller heile vintersesongen 2022/2023. Skisenteret er eit viktig tilbod både lokalt i Samnanger og regionalt i Bergensområdet, og gir også ringverknader for næringslivet og arbeidsplassar i kommunen. Det er vanskeleg å vita konkret kor store konsekvensar det vil ha for andre verksemdar dersom Eikedalen Skisenter held stengt den komande vintersesongen, men det vil etter alt å døme bli redusert omsetnad/inntekt for nokon verksemdar i Samnanger.

Dersom kommunen innvilgar straumstøtte til Eikedalen Skisenter, vil dette føra til økonomiske utgifter eller inntektstap på sal av konsesjonskraft for kommunen. Eit slikt vedtak vil også kunne gje presendens. Av omsyn til likebehandling vil det bli vanskeleg for kommunen å ikkje innvilga eventuelle søknader frå andre verksemdar i kommunen som har utfordringar med dei høge straumprisane. I så fall vil kommunen få ytterlegare ekstrautgifter/inntektstap.

Konklusjon:

Rådmannen tilrår ikkje at kommunen innvilgar søknaden om straumstøtte til Eikedalen Skisenter AS. Kommunestyret bør ta stilling til om det skal innførast ordning med straumstøtte for næringsdrivande i Samnanger, og korleis ordninga i så fall skal vera. Ei slik eventuell ordning bør kunngjerast, slik at alle næringsdrivande i målgruppa har moglegheit til å søkja.



SAKSFRAMLEGG

Sakshandsamar: Ragnhild Lønningdal	Arkivkode: FE-231
Arkivsaksnr: 18/1050	Løpenr: 22/8481
Sakstype: Politisk sak	

SAKSGANG

Styre, utval, komité m.m.	Møtedato	Saksnr
Formannskapet	10.11.2022	061/2022

Renovasjonsgebyr 2023

Rådmannen sitt framlegg til vedtak:

- Samnanger kommune vedtek at BIR AS får delegert fullmakt til fakturering og innkrevjing av avfallsgebyret på vegner av kommunen, jfr § 12 i Forskrift om håndtering av avfall fra husholdning. Avfallsgebyret tilhører Samnanger kommune.
- Prisen på renovasjonstenesta for 2023 vert sett ned med 1 %, med unnatak av eigenandelen for levering til gjenvinningsstasjonane og einskilde tenester utanfor standard renovasjon. Dette vert haldne uendra. Samnanger kommune vedtek avfallsgebyr i tråd med følgjande vedlegg:
Prismatrise_Samnanger_2023.PDF

Dokument som er vedlagt:

Prismatrise_Samnanger_2023.PDF
Vedlegg 1 rammebudsjett_Rammebudsjett for lovpålagt renovasjon i BIR 2023-endelig.PDF
Renovasjonsgebyr 2023 - Samnanger

Saksopplysningar:

Bakgrunn for saka:

Kvart år skal eigarkommunane i BIR vedta nye renovasjonsgebyr for komande år, og gje delegert fullmakt til BIR om fakturering og innkreving av avfallsgebyr for privathushald. Gebyrregulativ for 2023 som er utarbeidd av BIR er vedlagt.

Fakta grunnlag, problemskildring og moglege løysingar:

Med bakgrunn i at BIR skal ha lik pris på lik teneste er det viktig at alle eigarkommunane vedtek like prisar. Det er også ein føresetnad at kommunen sine vedtak omfattar samtlege tenester som skal tilbydast av BIR med samanfallande prisliste. Prisen på renovasjonstenesta for 2023 vert føreslått sett ned med 1 %. I fjor vart prisen sett opp med 15 %.

Vurderingar og konsekvensar:

Renovasjon grunnpris inkluderer ei tømning eller fem lukeåpningar pr mnd av restavfall, papir og plast kvar 4 veke. Tømningar av restavfall utover dette blir fakturert etterskotsvis.

Det er rekna inntil 140 liter restavfall per bueining. Dersom kundar ønskjer høgare volum, betalast "Renovasjon grunnpris - ekstra volum".

Dersom det er fleire kundar enn berekna per behaldar/container, betalast éin "renovasjon grunnpris" per bueining.

Nedanfor visast grunnpris pr bueining og fritidsbustad og kostnad i 2021, 2022 og framlegg for 2023.

Grunnpris	Pris 2021	Pris 2022	Framlegg 2023	Endring beløp	Endring %	Merknad
Renovasjon grunnpris	2 219,05	2 552,11	2526,59	-25,52	-1 %	Per bueining
Grunnpris ekstra volum	2 019,05	2 321,90	2298,68	-23,22	-1 %	Per 140 L
Fritidsbustad	2 505,32	2 881,11	2852,30	-28,81	-1 %	Kat 1
Fritidsbustad	1 252,66	1 440,56	1426,16	-14,41	-1 %	Kat 2: 50 % av kat 1

Ei komplett oversikt over renovasjonsgebyra, «Pristabell 2023», ligg vedlagt, og me rår til at denne vert vedteken.



SAKSFRAMLEGG

Sakshandsamar: Karl Viken	Arkivkode:
Arkivsaksnr: 22/830	Løpenr: 22/8468
Sakstype: Politisk sak	

SAKSGANG

Styre, utval, komité m.m.	Møtedato	Saksnr
Formannskapet	10.11.2022	062/2022
Kommunestyret		

Betalingsatsar 2023 - Gebyr og Avgifter

Rådmannen sitt framlegg til vedtak:

Samnanger kommunestyre vedtek gebyr- og betalingsatsar for 2023 slik dei ligg føre i [Gebyrliste - Samnanger kommune 2023](#).

Dokument som ikkje er vedlagt:

Ingen

Saksopplysningar:

Samnanger kommunestyre skal vedta betalingsatsar for gebyr- og avgifter for 2023.

I 2022 og tidlegare år vart det laga fleire eigne saker, men med overgangen til Framsikt er det naturleg å samle alle betalingsatsane for gebyr og avgifter i ei sak som er linka opp mot gebyrdelen i Framsikt. Her vil ein gjennom budsjetthandsaminga, og etter at budsjettet er vedteke enkelt kunne finne aktuelle satsar på alle område.

Framlegget til rådmannen til betalingsatsar avgifter og gebyr for 2023, er publisert i Framsikt, og du finn dei under *Gebyrliste* i Framsikt.

Det går fram av gebyrlista kor mykje dei ulike satsane er i 2022 og 2023 og den prosentvise auken. I oppjusteringa av satsane på dei ulike områda i gebyrlista er det i all hovudsak brukt det som har vore normal oppjustering. Mange satsar er gjeve ein auke på nivå med den generelle prisauken; 3 %.

Uttalar frå andre:

Ingen

Vurderingar og konsekvensar:

Vurderingar:

Med dette framlegget til kommunale betalingssatsar vil prisnivået i all hovudsak verta vidareført.

Konsekvensar:

Nokre endringar frå 2022 til 2023 utover den generell prisauken.

Konklusjon:

Samnanger kommunestyre vedtek betalingssatsar for gebyr og avgifter for 2023 lik *gebyrliste* i Framsikt.



SAKSFRAMLEGG

Sakshandsamar: Karl Viken	Arkivkode: FE-151
Arkivsaksnr: 22/326	Løpenr: 22/8310
Sakstype: Politisk sak	

SAKSGANG

Styre, utval, komité m.m.	Møtedato	Saksnr
Formannskapet	10.11.2022	063/2022
Kommunestyret		

Budsjett og økonomiplan 2023- 2026

Dokument som er vedlagt:

Vedtekne budsjettpremissar for 2023- 2026
Statsbudsjettet 2023 - kommuneopplegget
Brev frå Statsforvaltaren i Vestland Økonomiplan 2022- 2025
Plan prosjekt framtidig behov - tenestestruktur og lokasjonar
Program handlefridom - gjennomgang av drifta
Vedtekter innovasjons- og utviklingsfond - framlegg

Rådmannen sitt framlegg til vedtak:

Rådmannen sitt framlegg til budsjett for 2023-2025 i Framsikt vert lagt ut på høyring. Høyringsfrist vert sett til 24. november. Link til budsjettframlegget: [Økonomiplan 2023- 2026 Samnanger \(framsikt.net\)](https://framsikt.net)

1. Rådmannen sitt framlegg til budsjett 2023 og økonomiplan 2023- 2026 vert vedteke slik det ligg føre
2. Budsjettert låneopptak i 2023 med bakgrunn i investeringsbudsjettet er på samla 26,66 mill. kr. Av dette skal det takast opp eit lån på 5,5 mill. kr innan sjølvkost som skal gå til VA infrastruktur (4 mill. kr) og Reservevassforsyning (1,5 mill. kr).

Dette i samsvar med kommunelova § 14-15 fyrste ledd.

3. Økonomiplan for 2023-2026 og årsbudsjett for 2023 vert lik oppstillingane i

bevilgningsoversikt drift §5-4, bevilgningsoversikt investering §5-5, økonomisk oversikt drift §5-6 og oversikt gjeld og andre vesentlege langsiktige forpliktingar §5-7.

4. Årsbudsjettet for 2023 vert vedteke på sum netto driftsrammer for sektorane, rådmann, fellesinntekter og felleskostnader.
5. Rådmannen vert gjeven fylgjande fullmakter innanfor budsjettet sine rammer (jf. samsvar Økonomireglement og kommunen sitt finansreglement):
 - Justere budsjetta som følgje av sentrale og lokale lønsoppgjer
 - Budsjettreguleringar innanfor sektorane sine rammer
 - Gjennomføre låneopptak; nye lån og refinansieringar
 - Utføre budsjettreguleringar av teknisk karakter innanfor drift og investering
6. Kontrollutvalet vert gjeve ei ramme på 848 100 kr.
7. Barnevernsutvalet sitt budsjett vert vidareført, oppjustert til 2023- tal.
8. Det vert starta eit arbeid med heilskapleg plan for framtidige behov.
9. Program for handlefridom skal gjennomførast i planperioden 2023- 2026.
10. Det vert oppretta eit kommunalt innovasjons- og utviklingsfond med eigne vedtekter. Fullmakt og delegering vert ført inn i kommunen sitt delegeringsreglement.
11. Det vert gjeve ei fullmakt frå politisk nivå til rådmann i høve til å framforhandle avtalar som kan avslutte pågåande rettsaker innanfor barnevernsområdet. Dette innanfor dei økonomiske rammene for budsjett 2023.
12. Tilskot til Samnanger kyrkjestyre vert lagt fram i eiga sak
13. Betalingsattsar – gebyr avgifter 2023 vert lagt fram i eiga sak
14. Det vert skrive ut eigedomsskatt på faste eigedomar i kommunen i 2023. Den generelle skattesatsen som skal gjelda for dei skattepliktige eigedomane vert sett til 7 ‰. Satsane er differensiert ved at den satsen som skal gjelda for bustader og fritidseigedomar vert sett til 1,4 ‰. Satsen for bustadar og fritidseigedomar vert med det halvert.

For bustaddelen av eigedomen (gjeld og fritidseigedom) vert det gitt eit botnfrådrag på kr 30 000 av takstverdi. Botnfrådraget vert gitt for alle sjølvstendige bustaddelar.

Botnfrådrag vert ikkje gitt når eigedomen vert nytta til næringsverksemd.

Det vert skrive ut eigedomsskatt på det særskilte skattegrunnlaget som vert redusert med 5/7 delar i 2023. Skattesatsen på det særskilte skattegrunnlaget skal være 7 promille.

I medhald av eigedomsskattelova vert det gjeve fritak til stiftingar eller institusjonar som har som formål å gagna kommunen, fylket eller staten. Unnateke er kommersielle stiftingar/ institusjonar. Fritaket vil gjelda forsamlingshus, bedehus, turisthytter og liknande. Fritak kan og vurderast på grunnlag av søknad.

I medhald av eigedomsskattelova vert det gjeve fritak for bygningar som har historisk verdi med 100 prosent. Fritak kan og vurderast på grunnlag av søknad. Det er eit krav at bygget har bevart sin opphavlege arkitektoniske stil og at det ikkje vert brukt til forretningsverksemd.

I medhald av eigedomsskattelova vert det gjeve fritak for nybygde bustadeigedomar (gjeld ikkje fritidseigedomar) i 2 år, eller til kommunestyret endrar eller opphevar fritaket. Formannskapet får fullmakt til å avgjera einskildsaker om skattefritak.

Kommunestyret har vedtatt å bruka formuesgrunnlag frå skatteetaten for utskriving av eigedomsskatt på bustadhus. Bustadhus og hytter utan formuesgrunnlag vert takserte. Det same gjeld næringsverksemd, tomtar mm. Ved taksering og utskriving av eigedomsskatt nyttar kommunen dei til ei kvar tid gjeldande skattevedtekter.

Dokument som er vedlagt:

Vedtekne budsjettpremissar for 2023- 2026
Statsbudsjettet 2023 - kommuneopplegget
Brev frå Statsforvaltaren i Vestland Økonomiplan 2022- 2025
Plan prosjekt framtidig behov - tenestestruktur og lokasjonar
Program handlefridom - gjennomgang av drifta
Vedtekter innovasjons- og utviklingsfond - framlegg

Dokument som ikkje er vedlagt:

Økonomireglement
Finansreglement

Kva saka gjeld:

Økonomiplan for perioden 2023- 2026 og årsbudsjett for 2023 for Samnanger kommune.
Rådmannen sitt framlegg i Framsikt følgjer saka.

Det går fram av § 14-2 i kommunelova at kommunestyret skal vedta økonomiplanen og årsbudsjettet. Det går vidare fram av kommunelova (§ 14-3) at økonomiplanen og årsbudsjettet skal vedtakast før årsskiftet. Økonomiplanperioden er fire år.

Formannskapet skal etter kommunelova § 14-3 gje innstilling til kommunestyret til vedtak om økonomiplan og årsbudsjett.

Kapittel 14 i kommunelova gir også reglar om innhald og inndeling av økonomiplanen og årsbudsjettet.

Eigedomsskatt

I medhald av eigedomsskattelova vert det skrive ut eigedomsskatt på faste eigedomar i heile kommunen. Den generelle skattesatsen som skal gjelda for dei skattepliktige eigedomane vert sett til 7 %. Satsane vert differensiert ved at den satsen som skal gjelda for bustader og fritidseigedomar vert sett til 1,4 %. Satsen for bustadar og fritidseigedomar vert med det halvert.

For bustaddelen av eigedomen (gjeld og fritidseigedom) vert det gitt eit botnfrådrag på kr 30 000 av takstverdi. Botnfrådraget vert gitt for alle sjølvstendige bustaddelar. Botnfrådrag vert ikkje gitt når eigedomen vert nytta til næringsverksemd.

Det vert skrive ut eigedomsskatt på det særskilte skattegrunnlaget som vert redusert med 5/7 delar i 2023. Skattesatsen på det særskilte skattegrunnlaget skal være 7 promille.

I medhald av eigedomsskattelova vert det gjeve fritak til stiftingar eller institusjonar som har som formål å gagna kommunen, fylket eller staten. Unnateke er kommersielle stiftingar/ institusjonar. Fritaket vil gjelda forsamlingshus, bedehus, turisthytter og liknande. Fritak kan og vurderast på grunnlag av søknad.

I medhald av eigedomsskattelova vert det gjeve fritak for bygningar som har historisk verdi med 100 prosent. Fritak kan og vurderast på grunnlag av søknad. Det er eit krav at bygget har bevart sin opphavlege arkitektoniske stil og at det ikkje vert brukt til forretningsverksemd.

I medhald av eigedomsskattelova vert det gjeve fritak for nybygde bustadeigedomar (gjeld ikkje fritidseigedomar) i 2 år, eller til kommunestyret endrar eller opphevar fritaket. Formannskapet får fullmakt til å avgjera einskildsaker om skattefritak.

Kommunestyret har vedtatt å bruka formuesgrunnlag frå skatteetaten for utskriving av eigedomsskatt på bustadhus. Bustadhus og hytter utan formuesgrunnlag vert takserte. Det same gjeld næringsverksemd, tomtar mm. Ved taksering og utskriving av eigedomsskatt nyttar kommunen dei til ei kvar tid gjeldande skattevedtekter.

Eigedomsskatten skal betalast i 4. terminar.

Vurderingar og konsekvensar:

I rådmannen sitt framlegg til budsjett vert budsjettpremissane som kommunestyret vedtok følgt opp og innarbeida i framlegget. Vedtekne budsjettpremissar er vedlagt saka.

Det som ligg utanom budsjettet i høve til premissvedtak i juni, og som kommunestyret må ta stilling til er premiss nr 12. Til budsjettmøtet i desember skulle administrasjonen utgreie kva som skal til for å halda kunstgrasbana open, og eventuell kostnad med å halda kunstgrasbana vinteropen vert teken inn i budsjett for 2023. Det som ligg som ønska tiltak er 165 000 kr til brøyteutstyr og 40 000 kr til årleg ekstra vedlikehald grunna brøytinga.

I tillegg har ein ikkje klart å få netto driftsresultat så høgt som nøkkeltalet skulle tilseia; 2,5 %. Rådmannen er likevel nøgt med å kunne budsjettere med eit nettodriftsresultat for 2023 på 2,2 %. Eit slikt resultat for 2023 vil vere høgare enn tilrådd nivå på 1,75 %. Budsjettert netto driftsresultat for åra 2024- 2026 er og på eit tilfredstillande nivå; frå 1,7 % til 3,9 %. Dette er sær viktig, då gjeldsgraden til kommunen vil auke monaleg; frå 90 % i 2021 til 113 % i 2026.

Det vert elles vist til rådmannen sitt framlegg i Framsikt, og vedlegg til politisk sak for ytterlegare informasjon.